



BILTEN

OPĆINE SREBRENİK



CERTIFIKAT ISO 9001:2000
BROJ: 155865



IZDAJE: OPĆINA SREBRENİK • BROJ: 34 • MJESEC: APRIL/TRAVANJ 2011. • BILTEN JE BESPLATAN • TIRAŽ 500



"Skulptura Starog grada Srebrenika" autor Bjelić Alija iz Srebrenika

SADRŽAJ

- 2 Proslava 1. marta, Dana nezavisnosti BiH
- 3 25. sjednica OV-a i izbori za načelnika Srebrenika
- 4 26. i 27. sjednica OV-a
- 5 28. sjednica OV-a i novi turistički sadržaji
- 6 Povelja Stjepana II Kotromanića
- 7 Povelja Stjepana II Kotromanića
- 8 Posjeta ambasadora Malezije općini Srebrenik
- 9 Proslava 1. marta Dana CZ; Izgradnja Centra za djecu s posebnim potrebama
- 10 Nastup općine Srebrenik na sajmu Nexpo 2011
- 11 Krediti i stipendije; Novogodišnji prijem; 8. Dječiji festival muzike
- 12 Rasvjeta u Seoni; Aktivnosti za izgradnju puta Seona-Ratiš
- 13 Aktivnosti tokom „Dana povelje 2011.g.“
- 14 Aktivnosti tokom „Dana povelje 2011.g.“
- 15 Aktivnosti tokom „Dana povelje 2011.g.“
- 16 Razne kulturne aktivnosti
- 17 Razvojni projekti iz poljoprivrede
- 18 Održane Skupštine inovatora i radio amatera
- 19 Nova oprema i knjige za OŠ Gornji Hrgovi; Pušteno u pogon postrojenje za prečišćavanje vode za piće
- 20 Školske aktivnosti i takmičenja
- 21 Školske aktivnosti i takmičenja
- 22 Vjerske aktivnosti
- 23 Posljednji ispraćaj za Hasana Sarajlića i Džemala Buldića; Humanitarni koncert za Sandru Halilović
- 24 Sportske aktivnosti



Detalj sa polaganja cvijeća na spomen-kosturnicu

U Srebreniku obilježen 1. mart, Dan nezavisnosti BiH

U kino sali Doma kulture u Srebreniku, 28.02. 2011. g. održana je svečana sjednica Općinskog vijeća, kojom je na prigodan način obilježen 1. mart, Dan nezavisnosti Bosne i Hercegovine. Ovoj manifestaciji prisustvovali su vijećnici OV-a Srebrenik, te predstavnici vjerskih zajednica, boračkih udruženja, privrednih kolektiva, javnih ustanova i preduzeća te medija s područja srebreničke općine i TK-a. U sklopu obilježavanja ovog značajnog datuma, delegacija



Sa svečane sjednice OV-a

općine Srebrenik i boračkih udruženja, položila je prvo cvijeće na centralno spomen-obilježje i spomen-kosturnicu, te minutom šutnje odn. učenjem Fatihe, odala počast našim najboljim sinovima, nakon čega je načelnik općine Srebrenik Mehmed Bajraktarević pročitao referat. Nakon zvaničnog dijela učenici OŠ su priredili prigodan kulturno-umjetnički program u sklopu kojeg je Amar Ibrić,

učenik „Prve OŠ Srebrenik, održao recital o Bosni i Hercegovini i njenim narodima, dok je poznati srebrenički sazlija Ahmet Hogić odsvirao i otpjevao nekoliko sevdalinki.

U referatu povodom Dana nezavisnosti BiH načelnik Bajraktarević, je istakao:

-Ovo je značajan datum za sve nas koji živimo u BiH. Obilježavanje 19 godina od proglašenja nezavisnosti ima historijski značaj za našu državu. To je datum koji nas podsjeća da smo tada izašli na referendum i izjasnili se da želimo živjeti u nezavisnoj i samostalnoj državi BiH. Nažalost, nismo imali mnogo vremena za radovanje, jer je ubrzo uslijedila agresija na našu državu. Nismo mogli ni slutiti da neko neće poštovati odluku većine, a tada je većina kazala da želi ovakvu BiH. Ipak, u tako kratkom vremenu uspjeli smo se organizovati i oduprijeti znatno snažnijem neprijatelju, koji je ovaj plan imao u ladici već nekoliko godina i samo je čekao da ga realizuje. Nažalost, i dalje ima onih koji ne priznaju ovaj datum, iako žive u BiH.

Izveštaj sa 25. sjednice Općinskog vijeća Srebrenik

Na 25. sjednici Općinskog vijeća Srebrenik, koja je održana u četvrtak 30.12.2010. godine, usvojen je Nacrt budžeta za 2011. godinu u iznosu od 11.389.000 KM. Iako su v.d. načelnika Mehmed Bajrektarević, kao i ostali diskutanti, saglasni da je on preambiciozan, ipak će se nastojati realizirati u ovome iznosu. S obzirom da je budžet za narednu godinu bio tek u nacrtu, tako je usvojena i odluka o privremenom finansiranju za prva tri mjeseca 2011. godine, kao i odluka o odobranju sredstava za prijevremene izbore za načelnika općine Srebrenik u iznosu od blizu 60.000 KM. Izbori su planirani 16.01.2011. godine, a kandidati su: Mehmed Bajrektarević(SDA), Sanel Buljubašić(SDP), Novalija Ibrahimović(SBB) i Ibrahim Bajrektarević(nezavisni kandidat). Kao što je to učinjeno i nekim drugim mjesnim zajednicama, tako je Cagama (11.400 KM), a Lipju (3.000KM) otpisan dug prema izvođačima radova, koje će preuzeti Općina. Prihvaćen je i prijedlog o osnivanju MZ-e Huremi, koja je do sada djelovala u okviru MZ Špionica Donja. Na dnevnom redu se našao i jedan vrlo značajan doku-



Buljubašić Sanel polaže zakletvu

ment, a to je Strategija integranog razvoja općine Srebrenik u periodu 2011-2020. godina, koji je uz nekoliko sugestija i primjedbi prihvaćen. Navedena Strategija sadrži razrađeni plan razvoja ovog općinskog područja u ekonomskom, privrednom, infrastruktturnom, obrazovnom, kulturnom, turističkom, sportskom i dr. polju. Prihvaćena je i odluka o uslovima, kriterijima i postupcima imenovanja u upravne odbore zdravstvenih ustanova u vlasništvu Općine, gdje je istaknuto kako bi na ova mjesta, uz stručna, trebali doći i mladi, koji bi mogli unijeti nove ideje i pravce djelovanja i rada. Prihvaćen je i nacrt programa uređenja gradskog građevin-

skog zemljišta za narednu godinu u visini od 2.700.000 KM, u kojem je predložena izgradnja i rekonstrukcija novih ulica, dječijih zabavnih parkova, nabavka kontejnera, postavljanje novih signalizacija... U nacrtu je prihvaćen i program izgradnje infrastrukture u visini od 3.566.000 KM, a najviše sredstava (500.000 KM) predloženo je za izgradnju nove općinske zgrade u ulici Varoških polja. Na sjednici je došlo i do zamjene vijećnika Zlatka Šimića, koji je postao zastupnik u Skupštini TK-a, sa Buljubašić Sanelom, sljedećim sa rang liste SDP-a, koji je ovom prilikom položio i svečanu zakletvu.

Mehmed Bajrektarević novi načelnik općine Srebrenik

Na prijevremenim izborima za načelnika općine Srebrenik koji su održani 16.01.2011. godine, građani su glasali na 64 biračka mjesta, a bio je angažovan i jedan mobilni tim. Općinsko vijeće Srebrenik je odobrilo oko 60.000 KM za provedbu navedenih izbora i ista su obezbijedena iz budžeta općine Srebrenik. Kako smo saznali od Sakiba Ibračevića, predsjednika Izborne komisije Srebrenik, navedeni izborni proces je uspješno i bez većih problema završen. Nakon brojanja sa svih



Mehmed Bajrektarević

biračkih mjesta, na prijevremene izbore za načelnika općine Srebrenik, je izašlo 15063 birača ili 42,5%. Prema rezultatima najviše glasova je osvojio kandidat SDA Mehmed Bajrektarević 7231 ili 48%, drugi je kandidat SDP Sanel Buljubašić sa osvojenih 6395 glasova ili 42,4%, treći je kandidat SBB Novalija Ibrahimović sa osvojenih 765 glasova ili 5%, dok je nezavisni kandidat Ibrahim Bajraktarević osvojio 525 glasova odn. 3,5%.

Izvještaj sa 26. sjednice Općinskog vijeća Srebrenik

Prva sjednica Općinskog vijeća Srebrenik u 2011. godini, na kojoj je po prvi puta u ulozi načelnika bio Mehmed Bajrektarević, nagovijestila je kako su neminovne izmjene propisa o unutarnjoj organizaciji i sistematizaciji radnih mjesta u Općini, što je bilo posebno naglašeno prilikom usvajanja Informacije o inspekcijskom nadzoru općinskih inspekcija u 2010. godini. To je sugerisala i Kantonalna uprava za inspekcijske poslove, tako da se u narednom periodu može očekivati osnivanje zasebnog Odsjeka za inspekcije, ili možda čak i zasebne Službe za inspekcijske poslove, kako bi se uvelo više reda u dijelu tržišnog, zatim građevinskog, urbanističkog, sanitarnog, komunalnog, putnog, termo-energetskog, te inspektora rada za oblast zaštite na radu. Jedan od ključnih problema u 2011. godini bit će rješavanje pitanja sanitarne deponije, s obzirom da se postojeća u Babunovićima mora zatvoriti do kraja godine. Odgovarajući na zahtjeve koje su uputili mještani MZ Babunovići i koje je trebalo da ispuni JKP „9. septembar“, direktor ove firme je kazao kako oni to nisu u mogućnosti, tako da će, po svemu sudeći, obaveze preuzeti Općina. Radi se o nabavci vozila za kvalitetno deponovanje otpada, mjesečnom izdvajanju blizu 1.500 KM za ovu MZ-u, te upošljavanju 4 pripadnika ABiH na poslovima portira na deponiji. Dosta se vremena utrošilo i na Izvještaj o svim elementarnim nepogodama koje su našu Općinu zadesile u 2010. g., i koje su prčinile štete u iznosu od



Sa 26. sjednice OV-a

1.828.976 KM. Tokom diskusije je istaknuto da građani prave stambene i poslovne objekte bez potrebnih dozvola, na terenima koja su dokazano podložna klizanju zemljišta, da se ne brinu o odvodnji površinskih voda i sl. što često dovodi do velikih materijalnih šteta, kojih ne bi bilo ili bi bile znatno manje da nije ovakvih slučajeva, te da se takvim licima ne treba pomagati u saniranju štete. Mnogo pažnje izazvala je i Informacija o stanju vodosnad-bijevanja i hidrogeoloških istraživanja, gdje je naglašen problem kontrolisanja i kvalitetnog održavanja vodovoda, te da se ubuduće mora znati ko je odgovaran za posljedice eventualne epidemije. Bez većih rasprava usvojen je Program rada Općinskog vijeća Srebrenik za 2011. godinu, kao i zaključak o osnivanju MZ Kurtići i njenom izdvajanju iz MZ Brezik, kao i Prijedlog neprihvatanja ponude „Omega“ d.o.o. Živinice o prioritetu prilikom kupovine zemljišta pored magistralnog puta Tuzla-Orašje.

Izvještaj sa 27. sjednice Općinskog vijeća Srebrenik

Na 27. sjednici Općinskog vijeća Srebrenik, usvojena je Strategija integritanog razvoja općine Srebrenik u periodu 2011-2020.godina, gdje je analizirano dosadašnje stanje u Općini sa socio-ekonomskog aspekta, te usvojene konkretne mjere i prijedlozi razvoja ovog općinskog područja u narednih 10 godina. Vijećnici su prihvatili i prijedlog odluke o reviziji i provođenju plana parcelizacije dijela NN Kiseljak uz riječno korito, koje bi, u narednom periodu, trebalo da bude jedno od najljepših i najuređenijih dijelova Srebrenika. Bez rasprave je usvojen i prijedlog odluke o izmjenama i dopunama odluke o organizovanju i funkcionisanju zaštite od požara, zatim o osnivanju mjesne zajednice Kurtići, koja je do sada bila u sastavu MZ Brezik, dok je prihvaćen i prijedlog odluke o davanju saglasnosti za zaključenje sudske nagodbe u vezi sa slučajem stana Abdulaha Hadžića, u kojem je dogovoreno da se isplati Općini dio duga u narednom mjesecu, a ostatak u mjesečnim ratama. Takođe je odobreno i JP „Vodovod i kanalizacija“ da može upravljati nad izvoristom „Kugičko vrelo“. S obzirom da je imenovan na dužnost ministra poljoprivrede, vodoprivrede i šumarstva u Vladi TK, pravobranilac Imšir Škahić, razriješen je dosadašnje dužnosti. Za v.d. Općinskog pravobranioca imenovan je Samed Halilović do završetka procedure izbora i imenovanja novog Općinskog pravobranioca, a u nastavku sjednice data je saglasnost da se raspiše javni konkurs za navedeno radno mjesto. U nastavku sjednice usvojen je i izvještaj o radu Općinskog pravobranilaštva za 2010. godinu. Raspravljalo je se i o nacrtu odluke za utvrđivanje prosječne konačne građevinske cijene 1m² korisne stambene površine, gdje je predloženo da cijena ostaje ista kao i prošle



godine, dakle 950 KM, iako su pojedine građevinske firme tražile da se ova cijena snizi. S obzirom da je odluka u nacrtu, o njoj će se još raspravljati na narednoj sjednici. U nacrtu se raspravljalo i o izmjeni i dopuni kodeksa ponašanja općinskih vijećnika, gdje je bilo dosta različitih primjedbi, pa je ovaj dokument vraćen na doradu. Usvojen je i Izvještaj o radu boračkih organizacija, gdje je naglašen težak položaj ove populacije, te je predloženo da se, u skladu sa mogućnostima, istima povećaju sredstva iz budžeta, kao i Informacija o dobrovoljnom darivanju krvi, gdje je istaknuto da je odziv u prošloj godini bio mali i da bi se trebalo raditi na dodatnom stimulisanju darivaoca krvi. Došlo je i do izmjene predsjednika Komisije za izbor i imenovanje pa je umjesto Mersudina Dedića imenovan Adis Fazlić, a produžen je i mandat upravnom odboru JZU Dom zdravlja Srebrenik za 2 mjeseca. Na kraju je usvojeno rješenje o davanju saglasnosti Mutapčić Muhidinu iz Bukinja za otuđenje nedovršenog objekta te je usvojen zaključak o neprihvatanju ponude Smajlović Kasime i Smajlović Islama iz Srebrenika te Memagić Senade iz Živinica.

Izvještaj sa 28. sjednice Općinskog vijeća Srebrenik

Na 28. sjednici Općinskog vijeća Srebrenik, koja je održana 29.03.2011. g., jednoglasno je usvojen budžet za 2011. godinu u visini od blizu 11 miliona KM, tačnije 10.993.067,92 KM. Kako je kazao načelnik Mehmed Bajrektarević, on je više socijalni i djelimično razvojni, a u odnosu na prošlu godinu, gotovo svim korisnicima je umanjen za 5%, izuzev socijalnih kategorija, zatim boračkih udruženja, upošljavanja pripravnika, izdvajanja za sport, poljoprivredu... Dalje je Bajrektarević istakao da je za blizu 400.000 KM manji u odnosu na prošlogodišnji i da je poprilično realan i ostvariv, a kada je u pitanju razvojni dio da će se on odnositi na izgradnju poslovnih zona, završetak ugovorenih poslova iz oblasti infrastrukture, popravljavanja stanja vodnosnadbijevanja, posebno u Dubokom Potoku, Tinji i Podorašju, zbog čega se odustalo od hidrogeoloških istraživanja u iznosu od 100.000 KM. Znači sredstva će biti direktno usmjerena na popravljavanje stanja snadbijevanja pitkom vodom ovih područja. Planirana je i pojačana dinamika iz oblasti toplifikacije, koja će očit ove godine i započeti sa realizacijom, dok će biti urađena i reforma javne uprave sa početkom izgradnjom nove zgrade Općine u ulici Varoških polja. Izuzev ove tačke usvojen je i Prijedlog o izvršenju budžeta za 2011. g., kao i

općinskom području, u šta će biti investirano više od 3,5 miliona KM, a najviše za vodosnadbijevanje i kanalizaciju, izgradnju nove zgrade Općine, odvodnju površinskih voda i sanaciju klizišta...Usvojen je i Program uređenja gradskog građevinskog zemljišta za ovu godinu, u šta će se investirati više od 2 miliona KM i to za izgradnju i rekonstrukciju ulica, signalizaciju, uređenja pješačkih staza i trotoara...Vijećnici su prihvatili i Prijedlog da prosječna građevinska cijena jednog metra kvadratnog stambene površine ostane kao i prošle godine, dakle 920 KM, kao i Program rada općinskog načelnika za 2011. godinu. Prihvaćena je i Odluka da se proglasi od javnog interesa izgradnja „Centra za djecu s posebnim potrebama“, te Izvještaj o radu Komisije za utvrđivanje prometne nepokretnosti i prava, uz sugestiju da on ubuduće bude detaljniji. Informaciju o stanju bezbjednosti obrazložio je komandir PS Srebrenik, Edin Karić, uz ponovno iznošenje problema sa voznim parkom, koji se pod hitno mora obnoviti. Naglašeno je da je stanje u oblasti bezbjednosti zadovoljavajuće, ali i da je broj krivičnih djela, zatim materijalne štete u saobraćaju i maloljetničke delikvencije povećan. Na kraju sjednice usvojen je i Prijedlog za izdvajanje naselja Cerik iz Mjesne zajednice Špionica Centar, uz naglasak da se ozbiljno razmisli o ovoj učestaloj pojavi osnivanja novih MZ-a.

Za nove turističke sadržaje u Srebreniku 78.000 KM


Dana 24.02.2011.g., u kabinetu Općinskog načelnika Mehmeda Bajrektarevića, upričeno je svečano potpisivanje Ugovora između općine Srebrenik i UNDP-a, kojim su Općini odobrena novčana sredstva za realizaciju projekta: "Projekat izgradnje turističkog info pulta i suvenirnice na Pješačkoj zoni u Srebreniku te postavljanje turističke signalizacije na cijelom području Općine". Kako je istakao Nasir Nalić, koordinator projekta ispred UNDP-a, vrijednost projekta je oko 78.000 KM, pri čemu UNDP učestvuje u finansiranju sa 65.000 KM a općina Srebrenik sa 13.000 KM. – Turistički info pult i suvenirnica će se nalaziti na samom ulazu u Pješačku zonu, a realizacijom istih te postavljenjem turističke signalizacije obogatiti će se turistička ponuda općine Srebre-

nik-istakao je načelnik Bajrektarević. Da se konačno ozbiljno krenulo sa realizacijom krupnih projekata u navedenom sektoru potvrđuju i postavljeni pano sa kopijom Povelje Stjepana II Kotromanića, te završena izgradnja novog mosta na ulazu u Stari grad Srebrenik, koji će posjetiocima olakšati pristup ovom kulturno-historijskom spomeniku. Također je sanirana i pokrivena kula kod ulazne kapije, u kojoj će se otvoriti suvenirnica i informativni turistički biro. Navedeni poslovi su realizirani u sklopu projekta „Kultura za razvoj“. U ove radove uloženo je 70.000 KM, a sredstva je, posredstvom „MDGF“, donirala Vlada Španije. U skladu s finansijskim sredstavima, u ovoj godini bi se trebali nastaviti radovi na sanaciji



Novi most na Gradini

Starog grada. Prema već urađenom idejnom rješenju, u sklopu II i III faze ovog projekta, planirana je restauracija zidina Starog grada i pokrivanje preostalih kula. Planirana je i izgradnja parkinga, uređenje ljetne pozornice, proširenje pristupnog puta i dr.



Pano sa poveljom Stjepana II Kotromanića

Predstavljena povelja Stjepana II Kotromanića iz 1333. godine

U prisustvu brojnih zvaničnika iz Bosne i Hercegovine te Republike Hrvatske, obilježena je 678. godišnjica od prvog pomena imena grada Srebrenika u pisanim historijskim dokumentima. Zbog ovog svojevrsnog rođendana grada Srebrenika, dana 15.02.2011.g.,



Detalj sa nastupa glumaca i hora


na trgu Alije Izetbegovića u Srebreniku, svečano je otkriven pano s kopijom povelje bosanskog bana Stjepana II Kotromanića. Riječ je o povelji kojom vladar srednjovjekovne bosanske države 15. februara daleke 1333. godine, u cilju dobrosusjedskih odnosa i unapređenja trgovačkih veza, Dubrovačkoj republici daruje



Obraćanje ambasadora R. Hrvatske Tončija Staničića

Rat, Ston, Prevlaku i ostrva oko Rata. U tom dokumentu se prvi put spominje ime Srebrenika u pisanim historijskim izvorima i zbog toga se 15. februar iz 1333. godine obilježava kao rođendan ovog grada. Nakon izvođenja himne Bosne i Hercegovine, koju je izveo orkestar Druge osnovne škole Srebrenik, uz zvuke bubnjeva mladi srebrenički glumci Mašo Mehmedović i Dražen Pavlović su pročitali tekst povelje, nakon

čega su, uz paralelno izvođenje pjesme na latinskom jeziku od strane članica hora BZK „Preporod“ Srebrenik, pano zajednički otkrili Tonči Staničić, ambasador Republike Hrvatske u BiH i Mehmed Bajrektarević, načelnik općine Srebrenik. – Bosna i njeni Bosanci i Hercegovci su uvijek bili široke ruke i stalno su nekome nešto poklanjali. Nekome utočište i pomoć, nekome darove, nekome pažnju i ljubav, ali uvijek su



Obraćanje načelnika Bajrektarević Mehmeda

pružali svoju čestitu ruku prijateljstva i saradnje. Dubrov-

čani su ljubomorno čuvali ovu našu povelju i mi, zahvaljujući njima i njihovom državnom arhivu, danas je ponovo vraćamo ovdje, gdje je i nastala odn. napisana. U vrijeme nastanka povelje, Srebrenik je bio centar srednjovjekovne bosanske države, a o tome, uz ovu povelju, svjedoči i srednjovjekovna kula koja stameno stoji na padinama planine Majevice, kao stražar na kapiji Bosne. Danas smo se okupili da, zajedno sa svima Vama, po prvi put javno izložimo povelju bosanskog bana Stjepana II Kotromanića, svojevrsni rodni list našeg grada Srebrenika, kao još jedan od pisanih dokaza i potvrda bosanske državnosti-istaknuo je načelnik Mehmed Bajrektarević, naglasivši da će ovaj pano biti prozor u svijet i pogled u hiljadu godina dugu historiju naše zemlje Bosne. –Iz načelnikova obraćanja vidjeli smo koliko su duboke i daleke povijesne veze grada Srebrenika i Dubrovnika, što se nastavlja i danas kroz vezu Srebrenika sa Vinkovcima. Dan kada otkrivamo ovu povelju znači puno za veze između naših naroda što znači da moramo surađivati, da moramo izgrađivati prijateljske, dobre



Detalj sa okruglog stola

odnose, moramo zajedno u Evropu, ne zato da bismo otišli u Evropu, jer smo tu oduvijek bili nego da bismo se vratili kući-istakao je Tonči Staničić, ambasador Republike Hrvatske u BiH. U nastavku manifestacije u Plavoj sali Doma kulture u Srebreniku upriličen je okrugli sto na temu: "Povelja i njen značaj za Bosnu i Hercegovinu", o čemu su govorili doc. dr. Amira Turbić-Hadžagić, doc. dr. Edin Mutapčić i mr. Nermin Tursić.



Brojne zvaničnice su prisustvovalе otkrivanju panoa sa poveljom



Trenutak otkrivanja panoa sa poveljom



Malezijski ambasador posjetio Općinu Srebrenik

Načelnik Općine Srebrenik Mehmed Bajrektarević sa predsjedavajućim Općinskog vijeća Ibrahimom Zukićem, te donedavnim načelnikom Osmanom Suljagićem, dana 19.03. 2011.godine, primio je malezijskog ambasadora u BiH, Adnana Zulkiflija. Razlog posjete je bio zbližavanje naroda ovih dviju zemalja kroz razmjenu studenata, ali i pokušaj uspostavljanja privredne saradnje. -Naši privrednici iz Malezije jako su zainteresovani za rudnike kamena, kao i za drvnu industriju, prije svega proizvodnju namještaja i mislim da se u ovome dijelu može napraviti kvalitetna saradnja. Naše kompanije iz Malezije posebno su zainteresirane za obnovu starog rudnika uglja na planini Majevidi i eksploataciju izuzetno kvalitetnog kamenog uglja. Također, želimo da napravimo jedan projekat u kojem bi naši studenti završnih godina dolazili u posjetu domaćinstvima BiH i upoznivali se sa njihovim običajima i životima. Tako bi svaka porodica trebala da ugosti po jednog studenta na dvije do tri sedmice, gdje bi naši studenti učestvovali u svakodnevnom životu ovoga domaćinstva. U drugom dijelu željeli bismo da naši studenti rade u bh. kompanijama na četiri mjeseca, dakle da svaka kompanija primi po jednog studenta, a naravno sve troškove boravka plaćao bi Univerzitet u Maleziji, tako da bh. firme ne bi imale troškova prema ovim studentima, kazao je Zulkifli. Načelnik Bajrektarević je kazao kao je sretan i ponosan što Malezijci žele da na takav način upoznaju BiH, te je istakao spremnost da se napravi ova vrsta saradnja. Načelnik će razmotriti prijedlog da u julu ove godine 20

studenata iz Malezije posjeti Srebrenik, kako bi se upoznali s kulturom, tradicijom i običajima naroda ovog kraja. Također, malezijski ambasador je istakao još jednu želju: -Svake godine u BiH pravimo „Family day“ ili kako se to u Bosni kaže „familijarni dan“, gdje se jednog vikenda okupe svi Malezijci, koji žive i rade u BiH, sa svojim porodicama. Tu se družimo, igramo, plešemo, jednostavno zabavljamo se. Ako Srebrenik ima kvalitetnu ponudu da nas ugosti, ove godine bismo rado to napravili ovdje, kaže Zukilfli. Domaćini su potvrdno odgovorili i predložili da to bude Sportsko-rekreacioni centar „Orion“ na Ormanici, koji pruža izvanredne uslove za ovakvu manifestaciju. Na kraju prijema, načelnik Bajrektarević je malezijskom ambasadoru i njegovoj supruzi uručio slike Starog grada Srebrenika iz 1333. godine, kao i kopiju Povelje Stjepana II Kotromanića.



Ambasadoru Malezije je dodijeljena i kopija Povelje Stjepana II Kotromanića

Obilježen 1. mart, Dan civilne zaštite

Dana 02.03.2010.godine, u Plavoj sali Doma kulture u Srebreniku, održana je svečana sjednica Općinskog štaba civilne zaštite Srebrenik (OPŠCZ), kojom je na prigodan način obilježen 1. mart, Dan civilne zaštite BiH i Svjetski Dan civilne zaštite. Pored članova OPŠCZ,



Dodjela nagrade Musić Suadu

svečanoj sjednici prisustvovali su i predstavnici zakonodavne vlasti FBiH te zakonodavne i izvršne vlasti Općine Srebrenik, kao i predstavnici raznih udruženja građana s područja ove općine i brojni mediji. Na početku sjednice komandant OPŠCZ Srebrenik Mehmed Bajrektarević je svim prisutnim čestitao 1.mart, Dan nezavisnosti BiH i Dan civilne zaštite BiH, te ih ukratko upoznao sa značajem Civilne zaštite u današnje doba. Uvodni referat je podnio načelnik OPŠCZ Bajro Imširović, koji je između ostalog istakao: -U prošloj godini uspješno je realizirana teoretsko-praktična obuka pripadnika Gorske službe spašavanja(GSS), građanima je podijeljeno preko 4000 letaka edukativnog sadržaja, izvedene su dvije vježbe Profesionalne vatrogasne jedinice, razvili smo i obučili vatrogasni podmladak, a vrijedi istaći značajnu ulogu OPŠCZ Srebrenik tokom prirodnih nepogoda od klizišta i poplave, koje su više puta pogodile našu Općinu, pričinivši višemilionske štete.

Istaknutim pojedincima nagrade i priznanja dodijelio je komandant OPŠCZ Srebrenik Mehmed Bajrektarević. Pismena pohvala OPŠCZ Srebrenik dodijeljena je Musić Suadu i Jašarević Amiru, novčanu nagradu u iznosu od 300 KM dobila je dipl.ing.geol. Maksida Zukić, dok su zahvalnice dodijeljene Sumbić Almiru, Vatrogasnoj jedinici „Bergslangens raddningstjanst“ iz Švedske te Jahić Reufu. U obrazloženju je navedeno da je Musić Suad, kao uposlenik „ITK MUSIĆ“ d.o.o. Srebrenik, tokom



Novčana nagrada je dodijeljena Zukić Maksidi

trajanja prirodnih nepogoda od klizišta i poplave, veoma vješto i precizno upravljao raznim mašinama, nerijetko i u situacijama opasnim po ličnu sigurnost kao i po sigurnost mašine i objekta kojeg je štitiio, dok se Jašarević Amir pokazao kao najbolji u obuci GSS. Zukić Maksida je bez ikakve naknade obišla gotovo sva mjesta u općini Srebrenik, ugrožena klizištem, te predlagala stručna rješenja u izvođenju hitnih mjera sanacije klizišta, čime je u velikoj mjeri doprinijela da klizišta ne nanesu veće štete po ljude kao i da ne nastanu veće štete na materijalnim dobrima, dok je Sumbić Almir, kao naš građanin koji živi i radi u Austriji, u nekoliko navrata obezbijedio značajne



Nagrada Jašarević Amiru

donacije Profesionalnoj vatrogasnoj jedinici Srebrenik. Vatrogasna jedinica „ Bergslangens raddningstjanst“ iz Švedske krajem 2010. g. Profesionalnoj vatrogasnoj jedinici Srebrenik je donirala 17. intervencijskih vatrogasnih odijela, koja se procjenjuje na 20.000 KM, dok je Jahić Reuf, naš sugrađanin, koji duže vrijeme živi i radi u Švedskoj, najvažnija karika uveziivanja vatrogasne jedinice iz Švedske sa našim.



Nagradu je primila mati Sumbić Almira

Uskoro započinje izgradnja Centra za djecu s posebnim potrebama



Idejni projekat Centra za djecu s posebnim potrebama

Načelnik Općine Srebrenik Mehmed Bajrektarević sa svojim saradnicima, dana 08.02.2011.g ugostio je predstavnike međunarodnih orga-nizacija (Misije UN-a i UNDP-a, UNICEF-a i NVO "Hilfswerk Austria international"), koji će pomoći izgradnju Centra za djecu s posebnim potrebama u Srebreniku. Riječ je o jednom kvalitetnom i neophodnom projektu, s obzirom da ova populacija trenutno radi u dosta skromnim uslovima. Predstavnici „Udruženja civilnih invalida I i II kategorije“ kazali su kako na našem op-

ćinskom području ima registrovano blizu 180 djece sa posebnim potrebama, ali da ovo Udruženje svakodnevno radi s njih tridesetak, od čega 18 dolazi redovno u Udruženje, dok se za preostalih desetak organizuju kućne posjete. Što se tiče novog Centra, koji bi se trebao izgraditi u blizini „Druge osnovne škole Srebrenik“, prema prikazanom idejnom projektu, trebao bi biti izuzetno savremen, a njegova izgradnja i opremanje bi koštala blizu 200.000 KM. Što se tiče dinamike izgradnje i finansijske konstrukcije, nešto više je kazao Ibrahim Smajlović, koordinator infrastrukturnih projekata u Općini: - Do sada je Općina obezbijedila lokaciju, pribavile urbanističku dozvolu, zatim izradila idejni projekat, a uskoro će se obezbijediti i građevinska dozvola. Finansijsku konstrukciju zatvorit će Općina, zatim nadležna ministarstva s viših nivoa vlasti te međunarodne organizacije, koje su ovdje s nama danas, kazao je Smajlović.

Uspješan nastup općine Srebrenik na sajmu NEXPO 2011

U organizaciji Saveza općina i gradova Federacije BiH i Mreža asocijacija lokalnih vlasti jugoistočne Evrope (NALAS), te u saradnji sa Savezom općina i gradova Republike Srpske, a pod pokroviteljstvom Grada Sarajeva, dana 10. i 11. marta 2011. godine, u sarajevskoj dvorani „H. A. Samaranch“ održan je Prvi sajam općina i gradova jugoistočne Evrope "NEXPO - 2011". Prvi regionalni sajam, ovog karaktera u Sarajevu svečano je otvorio Vladimir Moskov predsjednik Mreža asocijacija lokalnih vlasti jugoistočne Evrope (NALAS), a prisutnima se, između ostalih, obratio i član Predsjedništva Bosne i Hercegovine Bakir Izetbegović. Svečanom otvaranju, pored organizatora, prisustvovalo je i 200 načelnika općina i gradova, od čega ih je 100 na štandovima predstavilo svoje lokalne zajednice. Zahvaljujući finansijskoj pomoći UNDP-a koji je platio štand i troškove boravka naših predstavnika Nedima Mujčinovića i Esada Dedića, na ovom značajnom događaju učestvovala je i naša Općina, a prema prvim utiscima i komentarima ostalih učesnika, navedeni su dosta kvalitetno predstavili naše privredne, turističke i kulturne sadržaje, kao i niz uspješnih projekata lokalne uprave, koji su realizovani zahvaljujući i pomoći UNDP-a, ILDP-a i MDGF-a, odn. finansijskoj pomoći Vlada Španije i Švicarske. Naša i općina Bosanski Petrovac su imali zajednički štand sa info pultovima, na kojima se nalazio brojni promotivni materijal (brošure Udruženja privrednika Srebrenik na bosanskom i engleskom jeziku, brošure općine Srebrenik na bosanskom, engleskom i arapskom jeziku, brošure o Starom gradu Srebreniku, razglednice Srebrenika i Starog grada, propagandni materijal srebreničkih firmi "Herceg", „Corn Flips“ i „Jafa Jase 4“, kao i našeg inovatora Smajlović Abdulaha te suveniri našeg Udruženja Civilnih invalida I i II kategorije. Naš štand je krasila i kopija Povelje Bosanskog bana Stjepana II Kotromanića kao i slika Starog grada te stećak, koji je obezbijedio Buljubašić Senaid, direktor JU Centar za kulturu i informi-

sanje, dok su u pozadini, putem projektor, konstantno prikazivani propagandni filmovi o Srebreniku (na našem, engleskom i arapskom jeziku) te o našoj privrednoj, turističkoj i kulturnoj ponudi. Za 2 dana trajanja sajma naš štand je

obišlo oko 1500 posjetilaca iz 50 zemalja svijeta, a gosti iz Turske (8 općina), Kine, Bugarske, Hrvatske i Slovenije pokazivali su najviše interesovanja u pogledu ostvarivanja buduće saradnje sa našom općinom. Obzirom da je cilj sajma komunikacija i ostvarivanje saradnje između gradova i općina u oblasti lokalnog poslovanja, privrede, turizma, zakonske legistative, kao i niza drugih segmenata, te razmjene različitih iskustava, naši predstavnici su uspjeli ostvariti brojne direktne kontakte a dokaz tome su i posjete gradonačelnika turskih gradova Bursa (gosp. Bulent Hamdi Cingil) i Bagcilar (gosp. Lokman Cagirici), generalnog direktora Turkish Airlines-a za BiH (gosp. Ahmet Salih Kansu)-kom prilikom je trojici imenovanih dodijeljena slika – kopija naše srebreničke Povelje, a vrijedi istaći posjetu konzula Saudijske Arabije u BiH, gosp. Mohammed Al Farshouti-ja i ambasadora Republike Makedonije, nj.e. g-dina Rami Rexepi-ja. Štand je posjetila i visoka delegacija Narodne Republike Kine, koju je predvodio g-din Zhan Yi, izvršni direktor za inostrane poslove za Evropu i Afriku, kineskog grada i pokrajine Wuxi Jiangsu kao i brojne druge delegacije iz zemalja regiona. Kopija Povelje je uručena i gosp. Dini Kabiljagiću, velikom prijatelju



Dodjela Povelje gradonačelniku Burse

dašnjih projekata podržanih od strane UN-a i UNDP-a. Posjetile su nas i snimale TV ekipe i novinari iz pomenutih turskih gradova, potom TV HAYAT, FTV, RTV TK-a, Radio „BIR“ i Radio „M“ iz Sarajeva. U okviru ceremonije zatvaranja Prvog sajma općina i gradova jugoistočne Evrope „NEXPO - 2011“, prezentirana je i potpisana finalna deklaracija, koju su sačinili organizatori i učesnici ove manifestacije. Posjetoci sajma su pored mnogobrojnih prezentacija općina imali priliku pogledati i bogat kulturno-umjetnički program, a posebno je impresivan bio nastup turskog



Na sajmu je bio i Mirza Ordagić orkestra „Mehteri“, najstarijeg vojnog orkestra na svijetu. Sajam su posjetili predstavnici evropske delegacije, Evropskog parlamenta i mnogi drugi ugledni gosti iz zemlje i inostranstva, a naše predstavnike je prvog dana sajma obišao i podržao Mirza Ordagić, općinski vijećnik i predsjednik Udruženja privrednika Srebrenik.

Učenicima i studentima 65.000 KM za stipendije i kredite

Učenici i studenti sa područja općine Srebrenik, dana 29.12.2010.godine u Plavoj sali Doma kulture, su potpisali ugovore sa Općinom o stipendiranju i kreditiranju za školsku 2010/2011. g., vrijedne ukupno 65.000 KM! Riječ je o 26 učeničkih



Ugovor je potpisala i Mirnesa Šabić, studentica 3. godine Ekonomskog fakulteta

stipendija te 62 studentska kredita, iako je za ove namjene aplicirao daleko veći broj učenika i studenata. –Na Konkurs koji smo objavili prije tri mjeseca, javilo se

100 učenika i 169 studenata, ali nažalost nismo mogli udovoljiti svim zahtjevima, obzirom da je da je broj stipendija i kredita ograničen. Svaki učenik dobit će po 500 KM i to u deset jednakih mjesečnih rata po 50 KM, a svaki student po 800 KM i to po 80 KM svakih deset mjeseci, i nadam se da će im to pomoći u lakšem i kvalitetnijem školovanju, kazao je V.D. načelnika općine Srebrenik Mehmed Bajrektarević. Zadovoljstvo potpisivanjem ugovora sa Općinom, nisu skrivali ni studenti, a Mirnesa Šabić, studentica 3. godine Ekonomskog fakulteta kazala nam je: –Jako sam sretna i zadovoljna što sam ispunila kriterije za dobivanje studentskog kredita. Koristim priliku da se zahvalim općinskom načelniku i nadležnoj Službi što nam svake godine omogućavaju povoljne kredite i stipendije, i mislim da će mi, kao uostalom i ostalim dobitnicima kredita i stipendija, ova sredstva biti od velike koristi tokom školovanja u narednoj akademskoj godini.

Azra Ordagić pobjednica „8. Dječijeg festivala zabavne muzike“



Nastup Azre Ordagić

Azra Ordagić, učenica „Prve osnovne škole“ Srebrenik, pobjednica je „8. Dječijeg festivala zabavne muzike“, koji je 29.12.2010.g. organiziran u SRC-u Srebrenik. Ona je od stručnog žirija dobila najviše poena, a publici se predstavila pjesmom „Sarajevo ljubavi moja“. Drugo mjesto pripalo je Lejli Zahirović iz „OŠ Duboki Potok“, a treće Arminu Dediću iz „OŠ Podorašje“. Manifestacija je održana pred oko 800 posjetilaca, koji su mogli uživati u dvosatnom nastupu kako učenika, tako i specijalnog gosta Envera Lugavića-Kiceta, koji je sa Senadom Imširović, Sanjinom Djedovićem, Denisom Kaltićem i Daliborom Mujčinićem, sačinjavao stručni žiri.

Tradicionalni novogodišnji prijemi i ispraćaji u penziju



Ispraćaj Joldić Šahe i Osmana Suljagića



Ispraćaj uposlenika Doma zdravlja u penziju

Dana 28.12.2010.godine u Plavoj Sali Doma kulture u Srebreniku, upriličen je tradicionalni novogodišnji prijem na kojem je V.D. načelnika općine Srebrenik Bajrektarević Mehmed primio predsjednike svih MZ-a sa područja naše Općine. Tom prilikom im je uručio prigodne novogodišnje poklone, a prilika je iskorištena i za kratak razgovor o najvažnijim infrastrukturnim projektima, koji bi se trebali naći kao prioriteta u 2011.godini, kao i o problemima koji su zajednički za sve MZ-e, a to je obezbjeđenje potrebnih sredstava za normalno funkcionisanje i rad MZ-a. Osim navedenog događaja vrijedi istaći da je, dana 24. 12.2010.godine, Sindikalna organizacija općine Srebrenik, organizovala novogodišnje druženje svih uposlenika Općine, koji su članovi sindikata, kom prilikom je prigodno obilježen odlazak namještenice Joldić Šahe iz Babunovića u penziju, kao i odlazak dosadašnjeg općinskog načelnika Suljagić Osmana na dužnost poslanika u Predstavnički dom Parlamenta FBiH. Paralelno sa ovom aktivnošću menadžment i sindikat JZU Dom zdravlja Srebrenik je na tradicionalnom novogodišnjem druženju svečano obilježio odlazak u penziju svojih uposlenika: Hogić Zlate, Smajlović Mersije, Suljkanović Safije i Okić Bešlage, zaželim im, prije svega, puno zdravlja u budućem životu.

Nove javne rasvjete

U prisustvu mještana i predstavnika izvršne i zakonodavne vlasti općine Srebrenik i Tuzlanskog kantona, u MZ Seona svečano je puštena u funkciju novoizgrađena ulična rasvjeta. U okviru još jedne u nizu akcija na unapređenju lokalne infrastrukture u Seoni, izgrađena je ulična rasvjeta u zaseoku Seona Centar, u dužini od oko 2 kilometra, a



Detalj sa otvaranja javne rasvjete u Seoni

osvijetljen je i prostor oko šehidskog spomen-obilježja. U realizaciju ovog projekta uloženo je 16.700 KM, od čega je iz budžeta općine Srebrenik izdvojeno 5.500 KM, a preostali iznos su prikupili mještani Seone. Na prigodnoj svečanosti u Seoni, najavljen je nastavak radova na izgradnji ulične rasvjete i u ostalim dijelovima ove mjesne zajednice. Kako je istakao Admir Dorić, predsjednik Građevinskog odbora, u okviru druge



Nova javna rasvjeta u ulici Hasana Kikića

faze ove akcije, planirana je izgradnja ulične rasvjete u zaseoku Dorići, kao i na dionici glavnog puta od šehidskog spomenika do naselja Dedići, u dužini od oko 1.600 metara. Predračunska vrijednost ovog projekta je 14.000 KM, a sredstva će osigurati općina Srebrenik i mještani Seone. Paralelno sa ovim projektom vode se aktivnosti i na rekonstrukciji i izgradnji novih rasvjeta u gradskim i prigradskim područjima Srebrenika. Tako je nedavno završena izgradnja nove javne rasvjete u ulicama 1. marta te 21. juna, te rekonstrukcija postojeće rasvjete duž regionalnog puta kroz naselje Bare, ukupne vrijednosti oko 5600 KM, a kompletna sredstva su obezbijeđena iz budžeta općine Srebrenik. Postavljanjem kvalitetnih svjetiljki tip OPALO sa NaVt sijalicom 100W duž reg. puta te štednih sijalica 36W u navedenim ulicama, postignuta je bolja osvijetljenost uz znatnu uštedu energije, tako da će se ova investicija otplatiti kroz nekoliko godina samo kroz manji utrošak el. energije.

Otpočele pripreme za asfaltiranje puta od Seone do dovišta na brdu Ratiš

Formiranjem Inicijativnog odbora, Medžlis IZ Srebrenik započeo je pripreme za rekonstrukciju i modernizaciju puta prema dovištu na vrhu brda Ratiš, koje se nalazi na tromeđi općina Srebrenik, Gračanica i Lukavac. Riječ je o dionici puta od srebreničkog naselja Seona do jedne od najviših kota brda Ratiš, na nadmorskoj visini od 624 metra, u dužini od 1.250 metara. Predračunska vrijednost projekta asfaltiranja navedenog puta iznosi oko 110.000 KM, a sredstva će, kako je planirano, osigurati općina Srebrenik, džemati s područja Medžlisa IZ Srebrenik i donatori. Radovi bi trebali startati s početkom građevinske sezone, a ova dionica puta trebala bi se asfaltirati do 6. maja, kada na ovom poznatom dovištu započinje organiziranje tromjesečnog ciklusa dova. Prema riječima Mevludina ef. Joldića, predsjednika Medžlisa IZ Srebrenik, lokalitet Ratiša predstavlja jedino dovište u BiH na kojem se svake godine od 6. maja do 2. avgusta, u kontinuitetu, svakog ponedjeljka održavaju dove. Zbog toga je, ističe Joldić, i pokrenuta inicijativa za asfaltiranje posljednje dionice ovog putnog pravca, kako bi se brojnim vjernicima iz Srebrenika i okoline olakšao pristup do jednog od najpoznatijih dovišta u BiH. Imajući u vidu



Detalj sa dovišta na Ratišu

činjenicu da ovo dovište svake godine pohodi na hiljade vjernika, u Medžlisu IZ Srebrenik očekuju da će ovo hairli djelo, uz općinu Srebrenik i džemate s područja srebreničkog Medžlisa, podržati i brojni donatori iz Srebrenika i susjednih općina.

Izložbom slika i fotografija otvoreni Dani povelje 2011



Detalj sa otvorenja Dana povelje 2011

U sklopu tradicionalne kulturne manifestacije "Dani povelje 2011", koja se svake godine u februaru održava u Srebreniku, baštineći kulturno-historijsko nasljeđe kraljevskog grada Srebrenika, dana 11.02.2011. u holu Doma kulture Srebrenik, otvorena je izložba slika i fotografija na temu Majevica i Staroga grada Srebrenika. Kombinirana izložba slika nastalih na likovnoj koloniji „Majevica 2010“ i fotografija Starog grada Srebrenika, autora Svjetlana Bešića, govori o jednom komplementarnom odnosu različitih vrsta umjetničkog izražaja, koji postižu svoju ravnotežu u jednostavnosti. Izložene slike je stvaralo osam likovnih umjetnika iz Bosne i Hercegovine i Srbije, od kojih je većina bila prisutna na ovoj izložbi. -Kada se fokusiram na izložene fotografije Starog grada Srebrenika, izložene u sklopu ove izložbe zanimljiva imena "Tragom bosanskih kraljeva", prožima me osjećaj da

stvarno čujem šapat bosanskih kraljeva, koji su stolovali među ovim zidinama. Nadam se da će Bešić ovim prekrasnim fotografijama uspjeti u promociji Starog grada Srebrenika, istakao je Amel Emrić, profesionalni fotograf agencije Asošijeted Pres. Izložbu a samim tim i kulturnu manifestaciju „Dani povelje 2011“ je proglasio otvorenom općinski načelnik Mehmed Bajrektarević, koji je između ostalog kazao: -Svjetlan Bešić je 2008. godine pokrenuo



Amel Emrić: Izvrsne slike

likovnu koloniju s imperativom spašavanja prirodnih ljepota planine Majevica i historijskog blaga koje predstavljaju Stari grad Srebrenik, i u tome istrajava već dvije godine a nadam se, naravno uz pomoć općine Srebrenik, koju je imao i do sada, da će nastaviti sa održavanjem kolonije i ubuduće. Osim što je Bešić veliki umjetnik on je još veći dobrotvor, obzirom da je ova



Svjetlan Bešić donira gitare

izložba prodajnog karaktera, a sav prikupljeni novac će ići za kupovinu instrumenata za potrebe polaznika Osnovne muzičke škole, koji su se, u pauzi izložbe, izvedbom niza klasičnih muzičkih numera predstavili brojnim posjetiocima. Bešić je ovom prilikom Hasanu Nurikiću, direktoru Prve OŠ Srebrenik, za potrebe Osnovne muzičke škole, donirao i dvije akustične gitare.



Detalj sa izložbe

Održani susreti planinara pod nazivom Povelji u pohode

U okviru kulturne manifestacije «Dani povelje 2011», Planinarsko društvo «Majevica» Srebrenik je dana 12.02. 2011.godine organiziralo, već tradicionalne, susrete planinara pod nazivom "Povelji u pohode". Oko 150 planinara iz Tuzlanskog i Posavskog kantona, Zenice, Travnika, Turbeta i Brčko DC je, nakon časa historije, koji im je upriličen unutar zidina Starog grada Srebrenika, prepješačilo stazu Brezje-Hamidov dol-Lipici. Na Planinarskom domu Lipici, na samom vrhu prelijepe planine Majevica, nakon zasluženog ručka, nastavljeno je cjelodnevno druženje planinara.



Zajednička fotografija planinara

Promovisan novi list „Ševak” te predstavljeni suveniri Srebrenika i numizmatička zbirka



Prof. Sadil Mehmedović promoviše 5. broj lista Ševak

Dana 14.02.2011.godine, u sklopu manifestacije „Dani povelje 2011”, u holu Doma kulture u Srebreniku, održana je promocija 5. broja godišnjaka „Ševak”. Kako je prilikom predstavljanja istakao prof. Sadil Mehmedović, obzirom da se radi o 5. broju godišnjaka, dakle malom jubileju, odlučili su da, u sklopu ovog izdanja, objave i 4 ranija broja godišnjaka „Ševak”, tako da je predstavljen stvarno impresivan jubilarni godišnjak na 64 stranice. U nastavku programa predstavljeni su suveniri grada Srebrenika koje je izradio Alija Bjelić, penzionisani nastavnik i zaljubljenik u umjetnost. Najviše pažnje je privukla trodimenzionalna skulptura Gradine te poprsje bana Stjepana II Kotromanića, oboje isklesano u drvetu, na kojima je autor radio punih osam mjeseci, ali ni ostali eksponati nisu prošli nezapaženo. Program je nastavljen numizmatičkom izložbom kovanog i papirnog novca od vremena antike do suvremenog novca, autora numizmatičara Muhidina Mešića. -Na

izložbi je izložen novac iz vremena Rimskog carstva, Dubrovačke republike, Otomanskog carstva kao i noviji novac iz cijelog svijeta, odnosno po jedna novčanica iz svake države, istakao je Mešić. Tokom ove manifestacije gledaocima su se predstavili i članovi Umjetničke radionice Srebrenik sa prigodnim programom „Gradu za rođendan”.



Alija Bjelić, autor suvenira Gradine i Srebrenika



Sa numizmatičke izložbe

Održan koncert ilahija i kasida

U okviru manifestacije «Dani povelje 2011», BZK „Preporod” Srebrenik je dana 12.02.2011.godine u 18,00 sati u kino sali Doma kulture, organizovao koncert ilahija i kasida. Pored članova Preporoda, posebno zapažen nastup su imali članovi Udruženja mladih „IHLAS” iz Brčko Distrikta te hor Medžlisa IZ Srebrenik, koji su u gotovo dvosatnom nastupu

oduševili oko 200 posjetilaca. Kako smo saznali od organizatora koncerta Preporod je poslužio kao „duhovni most” između ova dva hora, koji su ovom prilikom dogovorili naredne zajedničke nastupe u BiH i okolnim državama.



Hor Medžlisa IZ Srebrenik



Nastup UM "IHLAS" Brčko DC

Predstavom „Vrtlar“ u Srebreniku završeni Dani povelje

Dana 15.02.2011.godine, pozorišnom predstavom „Vrtlar“, rađenom po tekstu Davora Špišića i u režiji Dražena Ferenčine, a koja je pred oko 200 gledalaca održana u kino sali Doma kulture u Srebreniku, završena je manifestacija „Dani povelje 2011“. Predstava je rađena u koprodukciji Gradskog kazališta „Joza Ivakić“ iz Vinkovaca i Narodnog



Scena iz predstave "Vrtlar"

pozorišta Tuzla. Prema riječima redatelja Dražena Ferenčine, predstava je rađena za ovo doba i u dana-

današnjem stanju društva pun je pogodak, jer govori o površnosti društva i medija koji od svakoga, danas, mogu stvoriti medijsku zvijezdu, kojoj se svi dive i svi joj zavide. „Glavni lik predstave je vrtlar Jasmin Rasada, koga je maestralno odglumio Midhat Kušljagić, koji je savršeno dočarao težnju skromnog baštovana da se i dalje bavi svojim cvijećem, ma koliko ga zajednica isticala, a drugi željeli pridobiti za ostvarenje ličnih interesa. On je sav životni vijek posvetio isključivo uređenju vrta svog gospodara i o vanjskom svijetu zna samo ono što je vidio na televiziji. Kad gospodar umre, vrtlar je primoran izaći u svijet, koji mu je potpuno nepoznat, a u komunikaciji s ljudima zna govoriti jedino o uređenju vrtova. No, upravo te njegove rečenice mnogim njegovim sugovornicima zvuče kao neke dubokoumne misli, pa vrtlar neočekivano postaje neobično cijenjen, pa ga čak predlažu i za kandidata za predsjednika države“, kazao je o predstavi reditelj Dražen Ferenčina. U predstavi je nastupilo sedam glumaca, Midhat Kušljagić, Nermin Omić, Nenad Tomić i Elvira Aljukić iz tuzlanskog Narodnog pozorišta i troje iz vinkovačkog Gradskog kazališta Tatjana Bertok-Zupković, Vladimir Andrić i Maja Lučić. U projektu surađuju i Ivica Duspara koji je zadužen za muziku, scenografija je povjerena Ivici Zupkoviću, a kostime potpisuje Saša Došen.

Sjećanja na Aliju Izetbegovića

U organizaciji BZK „Preporod“ Srebrenik, početkom marta 2011.godine, u plavoj sali srebreničkog Doma kulture, održana je promocija knjige „Sjećanja na Aliju Izetbegovića“, autora Adamira Jerkovića iz Sarajeva. Kako je istakao mr. Nermin Tursić, predsjednik BZK „Preporod“ Srebrenik, promocija je upriličena povodom 85. godišnjice rođenja prvog predsjednika Republike BiH Alije Izetbegovića i 1. marta, Dana nezavisnosti BiH. O publikaciji, uz autora, na promociji su govorili prof. dr. Omer Ibrahimagić i mr. Nermin Tursić. –„Zahvaljujući svojoj viziji i spisateljskom daru, autor je pronikao u bit ličnosti Alije Izetbegovića, izuzetne ljudske gromade koji je pred kraj svog života ušao u politiku i stao na čelo svog naroda u najtežem vremenu, kada su mnogi u svijetu vjerovali da je bh. Muslimanima namijenjena sudbina raseljavanja ili potpunog uništenja“, istakao je prof. dr. Omer Ibrahimagić, naglasivši da se radi o projektu širih razmjera iz kojeg će proizaći još knjiga o Aliji Izetbegoviću. Na stranicama knjige čiji je izdavač „Almada“ iz Sarajeva autor provjerava šta o predsjedniku Aliji Izetbegoviću misle svjetski državni i uvaženi uglednici koji su s njim sarađivali. Jesu li su mu vjerovali i da li su smatrali da Bosna s njim na čelu, ima budućnost? Ovo je glavna poenta knjige koja se čita u dahu, a dolazi nakon uzbudljive trilogije „Alija izbliza“ u kojoj Adamir Jerković, nekadašnji savjetnik Alije Izetbegovića, govori o političkom djelovanju Alije Izetbegovića nakon Dayton. Ali to nije neizostavno priča samo o dobru i ljudskom poštenju rahmetli Alije Izetbegovića, već je to i pripovijedanje o ljudskim htijenjima i nemoći s kojim se suočava čovjek, kojem je prst sudbine dodijelio ulogu u strašnom času iz historije Bosne i

Hercegovine. –„Tek sam dotakao jednu temu i u narednom periodu predstoje mi razgovori s većim brojem državnika o životu i djelu Alije Izetbegovića koje ću pretočiti u još jednu knjigu, jer je za pravilnu valorizaciju njegove uloge u novijoj historiji naše države bitno i ono što o njemu kažu diplomate s kojima se susretao. Jako je važno da se sazna da li je iz njihove vizure bio hrabar i pošten ili muslimanski nacionalista, jer kritičari Alije Izetbegovića zanemaruju činjenicu da je on stao na čelo države u vrijeme kad je rapadom bivše SFRJ počela otimačina teritorije BiH. Bez Alije Izetbegovića, nezamisliv je prošli vijek, veliko i nemilo stoljeće u kojem su počeli i završili svi veliki ratovi, od Balkanskih preko Prvog i Drugog svjetskog, sve do hladnog rata, a koji su se doticali i Bosne i Hercegovine. Vrijeme u kojem su Srbi izvršili agresiju na hiljadugodišnju zemlju i počinili strašan genocid nad Bošnjacima Srebrenice i na drugim mjestima Bosne i Hercegovine u ovom prljavom ratu koji se vodio do



Sa promocije nove knjige Adamira Jerkovića

istrebljenja Bošnjaka. Ali i vrijeme u kojemu drugim sredstvima još traje agresija na Bosnu i Hercegovinu - zaključio je Adamir Jerković.

KUD „Mehmed Ibrahimović“ Srebrenik gostovao u Sloveniji



Sa nastupa KUD-a u Sloveniji

KUD „Mehmed Ibrahimović“ iz Srebrenika ovu godinu započelo je gostovanjem u južnoj Sloveniji, u naselju Lož u općini Loška dolina, u blizini granice sa Hrvatskom. Velika sala školske dvorane bila je pretijesna da primi sve one koji su željeli vidjeti nastup mladih ljudi koji su se predstavili koreografijama nošnji i igara naroda u BiH i okruženja, kao i izvođenjem tradicionalne bosanske pjesme sevdalinke. Oficijelni domaćin ovog kulturnog dešavanja bila je uspješna firma iz Loža „Kovinoplastika“, čija su postrojenja, članovi KUD-a „Mehmed Ibrahimović“, imali prilike upoznati pri obilasku. Gosti iz Srebrenika posjetili su i neke od najznačajnijih turističkih destinacija u glavnom gradu Slovenije Ljubljani, a sve zahvaljujući domaćina. Inače cjelokupno putovanje realizovano je uz finansijsku podršku firme doo „Herceg“ iz Srebrenika i direktora Ramiza Karića, koji uvijek pomaže ovakva kulturna dešavanja. KUD „Mehmed Ibrahimović“ iz Srebrenika je osnovan 1975. godine, za svoj rad je dobio veliki broj nagrada, diploma i priznanja, kako u BiH, tako i izvan naših granica, i ranije je imao zapažene nastupe u Sloveniji i Hrvatskoj a u narednom periodu planirana je posjeta KUD „Gračanica“ iz Zenice.

Gradski teatar Srebrenik gostovao u Sloveniji

Nakon dugih i opsežnih priprema i dogovora, Gradski teatar Srebrenik (GTS) je premijeru svoje nove komedije „Luđakinja“ održao u Velenju 15.01.2011. godine od 19h, a prvu reprizu iste predstave sutradan u Trbovlju. Ovu predstavu je dosta uspješno realizovala ekipa od 6 glumaca, dok scenario i režiju potpisuje osnivač i predsjednik nekadašnjeg Alternativnog a danas Gradskog teatra Srebrenik Fikret Mujkić-Čipo. U predstavi igraju: Anela Dorić, Adelisa Sejdinović, Arijana Moranjković, Džemal Ordagić, Alen Mehinović i Fikret Mujkić. Kako autor predstave navodi radi se o komediji situacije, radnja se odvija u

ludnici u kojoj se spletom okolnosti pojavljuje niz različitih likova: luđakinja, radnik, političar, vojnik, žena i doktor psihijatar. Od članova ekipe saznajemo da je navedena predstava pobrala



Detalj iz predstave u Velenju

odlične kritike publike u Velenju i Trbovlju, a poseban kuriozitet je taj što su većina gledaoca bili Slovenci, iako je predstava odigrana na bosanskom jeziku. Inače ovo je drugo gostovanje GTS u Sloveniji, a ovaj put je realizovano uz isključivu pomoć općina Velenje i Trbovlje, koje su za izvedbu predstave obezbijedile sale te poslale službenu pozivnicu za gostovanje.

Polugodišnji koncert polaznika Muzičke škole Srebrenik



Detalj sa nastupa

Dana 18.01.2011.godine u holu Doma kulture u Srebreniku polaznici odjeljenja Muzičke škole u Srebreniku su održali tradicionalni polugodišnji koncert. Direktor škole Hasan Nurikić kao i oko



Detalj sa nastupa

80 prisutnih roditelja i građana općine Srebrenik, su bili ugodno iznenađeni prezentiranim muzičkim umijećem polaznika škole na harmonici, gitari i klaviru. Najviše simpatija, kao i uvijek do sada, su pobrali polaznici prvog razreda dok su se polaznici drugog, trećeg i posebno četvrtog razreda predstavili kao već vrsni izvođači komplikovanih muzičkih djela. Kao što je poznato u Prvoj osnovnoj školi u Srebreniku, školske 2007/2008. g. formirano je odjeljenje Muzičke škole. Na osnovu viđenog postignut je pun pogodak, jer su svi mogli primijetiti

vidan napredak u sviranju kod svih polaznika, tako da učenici ali i njihovi



Nastavnici Muzičke škole sa direktorom

nastavnici zaslužuju sve pohvale. -Na osnovu viđenog, ovo je veliki plus i za općinu Srebrenik, obzirom da trenutno imamo 74 polaznika Osnovne muzičke škole a vremenom će ih biti sve više. Isti značajno povećavaju broj muzički pismenih osoba, što će do punog izražaja na nivou Općine, u brojnim sferama kulturnog života, doći nešto kasnije, kaže Nurikić Hasan.



Brojni građani su pratili nastup mladih muzičara

U Zagrebu predstavljene knjige autora iz Srebrenika

Dana 19.03.2011.godine, s početkom u 13 sati, u predivnom prostoru Knjižnice i čitaonice Bogdana Ogrizovića u Zagre-



Predstavljanje knjiga

bu, ispunjenom do posljednjeg mjesta, predstavljene su, između ostalih knjiga, i knjige autora iz Srebrenika, iz Bosne i Hercegovine: „Plavo srce“ autorice Fikrete Jašić, „Kao nada, kao govor, kao more“ autora Elisa Sofića i „Fantazmagorije vremena“ autora Kemala Nurkanovića. Da se radi o veoma uspje-



lom predstavljanju naših autora, osim izuzetnog prijema od strane prisutnih poštivalaca lijepe riječi, govore i odlične kritike predstavljenih djela od strane hrvatskih kritičara.

Sastanak sa poljoprivrednicima

U cilju povezivanja primarnih poljoprivrednih proizvođača, otkupljivača i prerađivača poljoprivrednih proizvoda, dana 15.03.2011. g., u Domu kulture u Srebreniku održan je sastanak predstavnika Općine, Ministarstva za poljoprivredu TK-a, Poljoprivrednog zavoda TK-a i zemljoradničkih zadruga „Gračanica“ iz Gračanice i „Glumine“ iz



Detalj sa sastanka

Zvornika s poljoprivrednicima s područja ove Općine. Sastanku je prisustvovalo preko 100 srebreničkih poljoprivrednika zainteresiranih da u kooperaciji sa zemljoradničkim zadrugama organiziraju proizvodnju krastavca-kornišona, maline, kupine, jagode i duhana. Uz osiguran plasman poljoprivrednih proizvoda po dogovorenoj cijeni, predstavnici zemljoradničkih zadruga potencijalnim kooperantima dostavit će sjemena i ostali repromaterijal na kućni prag i to na beskamatni kredit. Naime, kooperantima se nudi da preuzeti repromaterijal plate isporukom gotovih poljoprivrednih proizvoda, tako da se u ovaj projekt mogu uključiti svi koji imaju manje parcele poljoprivrednog zemljišta i koji žele da rade, jer za početak proizvodnog ciklusa nisu neophodna bilo kakva finansijska sredstva. Ističući da općina Srebrenik ima veliku razvojnu šansu upravo u proizvodnji hrane, općinski načelnik Mehmed Barjaktarević je naglasio da će općinske vlasti, dodjelom državnog zemljišta, pokušati osigurati preduvjete da se u ovaj projekt uključe i prognaničke porodice s privremenim boravkom na području ove Općine. Okupljeni poljoprivredni proizvođači pokazali su veliki interes za ovaj projekt, tako da je realno očekivati da se narednog ljeta proizvodnjom kornišona, maline, kupine, jagode i duhana osigura egzistencija za oko 150 porodica s područja ove općine.

Prezentirani projekti razvoja poljoprivrede na području općine Srebrenik

Krajem marta 2011.g., u kabinetu općinskog načelnika Mehmeda Barjaktarevića, održan je radni sastanak s predstavnicima Ministarstva poljoprivrede, šumarstva i vodoprivrede TK-a, Poljoprivrednog zavoda TK-a, trgovačkog lanca „Bingo“ i Tvornice Corn-flips Srebrenik, na kome se razgovaralo o mogućnostima organizovanog otkupa voća i povrća, te instaliranju postrojenja za preradu i skladištenje poljoprivrednih proizvoda na ovom općinskom području. Incijativu za instaliranje hladnjače pokrenuli su predstavnici TC „Bingo“ zajedno s predstavnicima Corn-flipsa, a realizacijom ove ideje zaokružio bi se proces proizvodnje, otkupa, skladištenja, prerade i zagarantovanog plasmana poljoprivrednih proizvoda putem prodavnica tržnog lanca Bingo. S



Dogovaran razvoj poljoprivredne proizvodnje

obzirom da je riječ o aktivnostima koje daju mogućnost upošljavanja većeg broja radno sposobnog stanovništva kroz ovaj vid poljoprivredne proizvodnje, svu neophodnu tehničku podršku je obećao i načelnik općine Srebrenik Mehmed Barjaktarević. Uzimajući u obzir da se ovim projektom štiti domaća poljoprivredna proizvodnja, te potiče povećani plasman domaćih poljoprivrednih proizvoda, kroz zagarantovani otkup i osigurano tržište, nesebičnu podršku projektu, kroz prizmu podsticajnih sredstava, je obećalo i resorno kantonalno ministarstvo predvođeno ministrom Imširovom Škahićem. Jedan od ključnih aktera prezentiranih projekata je Tvornica Cron-flips, te je predstavnik menadžmenta Husnija Avdić upoznao prisutne da se firma još uvijek nalazi u stečajnom postupku, te zatražio od predstavnika Vlade



Detalj sa sastanka

TK-a i Općine da se dodatno angažuju na ubrzanom rješavanju konačnog statusa ovog preduzeća.

Zimska škola pčelarenja



Zimska škola pčelarstva

U organizaciji Udruženja pčelara „Roj“ Srebrenik, u prostorijama Prve osnovne škole Srebrenik krajem januara 2011.g. započela je Zimska škola pčelarstva za članove ovog udruženja, ali i sve zainteresirane građane koji se iz hobija već bave ili se namjeravaju započeti baviti pčelarstvom. Prvog dana zimskog seminara pčelari su imali priliku čuti korisne informacije o opravdanosti bavljenja pčelarstvom, ekonomskoj koristi od ove djelatnosti, sadržaju pčelinjeg društva i njegovoj odbrani. Programom škole pčelarstva je u narednih desetak subota obrađeno još 35 tema, a na samom kraju seminara organizirana je i praktična edukacija u jednom od srebreničkih pčelinjaka. Sve teme realizirali su stručnjaci iz ove oblasti i certificirani srebrenički pčelari, a svi polaznici Škole pčelarstva na kraju su dobili odgovarajući sertifikat. Pašezad Zukić, predsjednik Udruženja pčelara „Roj“ Srebrenik ističe da su se na organizaciju Škole pčelarstva odlučili s ciljem dodatne edukacije svojih članova i onih koji se ovom djelatnošću bave iz hobija, jer bez poznavanja savremenih trendova u ovoj oblasti nema uspješne proizvodnje meda. Pohađanje Škole pčelarstva je bilo besplatno, a sredstva za realizaciju programa edukacije srebreničkih pčelara osiguralo je Udruženje pčelara „Roj“ Srebrenik.

Održana godišnja Skupština Udruženja inovatora općine Srebrenik



Dodjela seta alata direktoru OŠ Rapatnica

Dana 05.03.2011.godine, u plavoj sali srebreničkog Doma kulture, održana je godišnja Skupština Udruženja inovatora općine Srebrenik, kojoj su, uz srebreničke inovatore, prisustvovali i predstavnici općine Srebrenik, Ministarstva za obnovu razvoja i povratak TK-a te svih osnovnih škola s područja ove općine. Govoreći o rezultatima ostvarenim u proteklom periodu, Nusret Duranović, predsjednik Udruženja inovatora Srebrenik, je posebno naglasio da je ovo udruženje uspješno realiziralo pet projekata usmjerenih na podsticaj inovatorstva u privrednim kolektivima, obrazovnim ustanovama i ekološkim udruženjima. Uz podršku Ministarstva civilnih poslova BiH, u prošloj godini započela je i realizacija projekta jačanja računarskih kapaciteta i priključivanja svih osnovnih škola i Udruženja inovatora na internet, te izrade njihovih web stranica. Ovaj projekt, ali i nekoliko organiziranih konkursa za najbolje inovacije na kojima su dodijeljene novčane nagrade najboljim inovatorima, prema riječima Nedima Mujčinovića, sekretara UIS-a, trebali bi doprinije-

ti još većoj popularizaciji inovatorstva među učenicima srebreničkih osnovnih škola. Iako je formirano tek prije nešto više od tri godine, Udruženje inovatora Srebrenik iznjedrilo je veliki broj mladih inovatora na području ove općine čiji su pojedini izumi već našli primjenu u praksi. Kako je istakao Abdulah Smajlović, predsjednik Nadzornog odbora i najpoznatiji inovator na području ove općine, među brojnim mladim članovima ovog udruženja posebno se ističu Alma Sadić i Dževad Dedić, koji su za svoje inovacije osvojili više zlatnih, srebrenih i bronzanih medalja na međunarodnim sajmovima inovacija u Koreji, Mađarskoj, Siriji, Hrvatskoj, Poljskoj, Srbiji.... U cilju stimulisanja inovatorskog rada u srebreničkim školama, Fahrudin Karić, predsjednik Skupštine UIS-a, u nastavku sjednice je predstavnicima svih 8 OŠ uručio po jedan komplet alata za nastavu tehničkog odgoja i informatike, za šta je navedeno udruženje izdvojilo oko 1100 KM.



Prisutni na Skupštini UIS-a

Godišnja Skupština Kluba radioamatera E71EBS Srebrenik

Dana 05.02.2011.godine, u motelu „Orion“ u Ormanici kod Srebrenika, održana je redovna godišnja Skupština Kluba radioamatera „E71EBS“ Srebrenik, na kojoj su usvojeni izvještaji o radu za prošlu godinu i program aktivnosti za naredni period. –„ I pored finansijske krize, u prošloj godini uspjeli smo realizirati program edukacije mladih radioamatera, a uzeli smo i učešće na svim značajnijim domaćim i međunarodnim takmičenjima u radioamaterskoj goniometriji. Uspjeli smo obnoviti u ratu devastiranu tehničku opremu, koja je omogućila našim članovima da u prošloj godini putem radio-veza uspostave kontakte s radioamaterima iz cijelog svijeta. Bili smo i uspješni domaćini prvenstva BiH u radioamaterskoj goniometriji, a uspjeli smo i podmladiti naše redove, tako da se trenutno svrstavamo u red najmasovnijih i najbolje organiziranih radio klubova u BiH“, istakao je Pašaga Demirović, predsjednik kluba radioamatera Srebrenik. Na sjednici je donijeta i odluka o povećanju članarine koja će u ovoj godini za zaposlene članove iznositi 25 KM, za penzionere 15 KM, za nezaposlene 5 KM, dok će učenici osnovnih i srednjih škola biti oslobođeni plaćanja



Sa Skupštine kluba radio amatera

članarine. Zaslužnim pojedincima i kolektivima uručene su zahvalnice za doprinos u razvoju radioamaterizma, a nakon sjednice upriličeno je druženje domaćina i njihovih gostiju iz radioamaterskih klubova s područja Tuzlanskog kantona i Distrikta Brčko.

Za područnu OŠ u Gornjim Hrgovima oprema i knjige u vrijednosti od 10.000 KM



Prof. Marijan kraj dijela donirane opreme

Dana 10.02.2011. godine područna OŠ u Gornjim Hrgovima kod Srebrenika je postala bogatija za opremu i knjige u vrijednosti od 10.000 KM. Kako smo saznali od nastavnice razredne nastave Ilić Adile i njenog supruga, odnedavno penzionisanog učitelja Ilić Vlade, već duži vremenski period se osjećala potreba za nabavkom novih kompleta lektira za učenike ove škole, a o nabavci novog televizora, laptopa, računara, radnih stolova i stolica te ormara, su, u današnjim vremenima teške oskudice, mogli samo sanjati. Međutim da sve ne ostane samo njihovo maštanje pobrinuo se Marjančević Marijan, prof. razredne nastave u naselju Bijela, Brčko DC, koji je nekada bio

nastavnik u OŠ Gornji Hrgovi, koji je pripremio kvalitetan projekat za opremanje ove škole neohodnom opremom, predračunske vrijednosti 100.000 kuna (oko 25.000 KM), te sa istim aplicirao na natječaj Ministarstva znanosti i obrazovanja Vlade Republike Hrvatske. Natječaj je bio objavljen u aprilu 2010.g.,

i u veoma jakoj konkurenciji za realizaciju projekta je odobren novčani iznos od 40.000 kuna (oko 10.000 KM). Po dobijanju novčane donacije prof. Marijan je nabavio i predao OŠ u G. Hrgovima dva dvokrilna ormara sa 6 polica, jedan laptop, jedan desktop računar sa LCD monitorom, jedan 29" LCD televizor, jedan DVD, jedan CD plejer, jedan laserski printer, stol sa stolicama te pedeset veoma kvalitetnih knjiga za lektiru, za šta je utrošio oko 10.000 KM. Nova oprema i knjige bi trebale znatno poboljšati kvalitet nastave u ovoj školi.



Nastavnice pored doniranih ormara sa knjigama

Pušteno postrojenje za prečišćavanje vode za piće



Detalj sa otvaranja novog postrojenja

U prisustvu mještana i predstavnika vlasti općine Srebrenik i Tuzlanskog kantona, na lokalitetu „Kugičko vrelo“ u Bjelavama kod Srebrenika svečano je pušteno u probni rad savremeno postrojenje za prečišćavanje vode za piće. Kako je istaknuto na prigodnoj svečanosti, bunar na Kugičkom vrelu urađen je još 1990. godine, a zbog povećanja broja korisnika, šest godina kasnije izvršena je njegova sanacija i revitalizacija, ali i pored sanacije ostao

je prisutan problem povećane mutnoće vode za piće. Zbog toga je ovog puta instalirano najsavremenije postrojenje za prečišćavanje vode za piće, a u okviru ovog projekta urađena je i nova zgrada crpne stanice, taložnici mulja, šahtovi i ostali prateći objekti koji garantiraju potpuno odstranjivanje mulja iz vode. Radove je izvela firma „Road-Ing“ iz Gračanice, a savremeno postrojenje s tehničkim rješenjima koja se primjenjuju u Evropskoj uniji, potpuno je automatizirano i ima mogućnost daljinskog praćenja i upravljanja. Probni rad savremenog postrojenja trajat će 12 mjeseci i u tom periodu izvođač radova bi trebao da dokaže sve projektovane tehničke parametre, a u međuvremenu bi se trebao izgraditi i još jedan rezervoar kapaciteta 100 kubnih metara koji će osigurati stabilnije snabdijevanje vodom za piće. U realizaciju projekta izgradnje savremenog prečišćavača vode za piće uloženo je 196.000 KM, a sredstva su osigurali općina Srebrenik i Agencija za vodno područje slivova rijeke Save iz Sarajeva. Realizacijom ovog projekta osigurano je kvalitetnije snabdijevanje vodom za piće oko 700 domaćinstava u Bjelavama i Dubokom Potoku, te dijelu naselja Dedići.

Kulturno-umjetničko stvaralaštvo učenika Druge OŠ



Nastup učenika područne OŠ Čehaje

Dana 30.12.2010.godine, u kino sali Centra za kulturu i informisanje u Srebreniku, održana je, već tradicionalna, 4. smotra kulturno-umjetničkog stvaralaštva učenika Druge osnovne škole Srebrenik. Pred oko 500 posjetilaca, učenici predvođeni učiteljima i nastavnicima, su predstavili veoma

bogat i raznovrstan program. Najviše aplauza, kao i uvijek do sada, su dobili najmlađi učesnici-polaznici devetogodišnjeg obrazovanja, predstavili recitacijama, pjesmom i dramskim izvedbama, ali su i ostali učenici kroz nastup u horu, brojnim plesnim i folklornim izvedbama, vokalnim nastupima i nastupima orkestara zaslužili najvišu ocjenu. Kako je na početku smotre istakao direktor Druge osnovne škole Emir Hozić, ovo je i donatorska smotra, s obzirom da će svi prisutni, kupovinom karte od 3 KM, pomoći menadžmentu škole u kupovini neophodnih nastavnih sredstava, knjiga i učila. I ova, kao uostalom i prethodne smotre, u potpunosti je uspjela, o čemu, osim prepune kino sale, govore i zadovoljna lica roditelja, nana i djedova, koji su, «naoružani» fotoaparatom i video kamerama, pratili i ovjekovječavali svaki korak svojih najmilijih, a o radosti učenika koji su nastupali ne treba ni govoriti. Jedina zamjerka se možda može uputiti na vremenski termin početka smotre, jer smotra koja počinje u 15 sati i traje 2 sata, po izuzetno hladnom vremenu, predstavlja veliko opterećenje kako za učenike i nastavnike, tako i za roditelje.

Dokumentarni film Prve OŠ Srebrenik prvi u Zenici



Dana 11.12.2010. godine u Multiplex kinu Ekran u Zenici, pod pokroviteljstvom općine Zenica, održan je „12. festival filma djece i omladine“. Na festival je prijavljeno 120 filmova čiji su autori mladi iz osnovnih i srednjih škola s područja Tuzlanskog, Unsko-sanskog, Zeničko-dobojskog, Sarajevskog i Srednjobosanskog kantona. Žiri, kojim je predsjedavala glumica BNP Zenica Faketa Salihbegović-Abdagić, je imao dosta težak zadatak tj. odabrati najbolja ostvarenja u oblasti dokumentarnog, igranog i crtanog filma. U jakoj konkurenciji učenici Prve OŠ Srebrenik su filmom „Večeras ćemo za njih voljeti“, autora Amara Ibrića i Amile Lelić, uspjeli osvojiti 1. mjesto za najbolji dokumentarni film u kategoriji OŠ. Ovaj rekli bismo ponovljeni uspjeh naših osnovaca (i prošle godine su osvojili 1. mjesto) govori da njihovi dosadašnji rezultati i osvojene nagrade više nisu slučajnost, nego plod kvalitetnog rada učenika i nastavnika škole. Film je osvojio prvo mjesto i na državnoj smotri naučno-tehničkog stvaralaštva mladih BiH. Iz razgovora sa filmskom ekipom Prve osnovne škole smo saznali da je film „veza između mladih danas i boraca koji su dali svoj život za odbranu BiH“, njima je film i posvećen.

Općinsko takmičenje učenika osnovnih škola iz matematike

U prostorijama Druge OŠ u Srebreniku, sredinom marta 2011.g., održano je općinsko takmičenje učenika OŠ iz matematike, na kojem su nastupile ekipe svih 8 škola s područja ove općine. U kategoriji VI razreda devetogodišnje škole najbolji je bio Muhamed Tabaković (OŠ „Špionica“), druga je Ružica Simić (OŠ „Podorašje“), a treći Emir Delić (Prva OŠ). U konkurenciji učenika VI razreda osmogodišnje i VII razreda devetogodišnje škole prva je Adelisa Mustafić (Druga OŠ), drugi je Šulejman Salkić (Prva OŠ), a treći Ermin Muratović (OŠ „Podorašje“). Među učenicima VII razreda osmogodišnje škole najbolje znanje pokazao je Emir Muratović (Druga OŠ), druga je Vildana Sekić (Druga OŠ), a treća Ajla Husić (Druga OŠ). Najbolji matematičar među učenicima VIII razreda osmogodišnje škole je Džemal Jukić (Druga OŠ), drugi je Adis Čizmić (Druga OŠ), a treća Vanesa Dedić (OŠ „Podorašje“). U ekipnoj konkurenciji najbolja je bila Druga OŠ sa čak 537 bodova, druga je OŠ „Podorašje“ s 383 boda, dok je treća OŠ „Tinja“ s 266 bodova. Za najuspješniju nastavnicu proglašena je Mirela Zahirović iz Druge OŠ Srebrenik. Najboljim mate-matičarima uručene su diplome i nagrade, a po tri najbolje plasirana učenika izborila su pravo učešća na kantonalnom takmičenju.



Najbolji matematičari

Održano takmičenja osnovaca iz fizike



Najbolji učenici OŠ iz fizike

U prostorijama OŠ „Duboki Potok“, krajem marta 2011. godine, održano je općinsko takmičenje osnovaca iz fizike, na kojem je učestvovalo 48 učenika VII i VIII razreda iz svih 8 osnovnih škola s područja općine Srebrenik. U konkurenciji učenika VII razreda prvo mjesto dijele Ilija Mijić (OŠ „Podorašje“) i Albina Hasić (OŠ „Duboki Potok“) koji su osvojili po maksimalnih 100 bodova, a slijedi Ilma Mutapčić (Prva OŠ). U ekipnoj konkurenciji 1. mjesto je osvojila Prva OŠ Srebrenik, druga je OŠ „Duboki Potok“, a treća OŠ „Podorašje“. Među učenicima VIII razreda najbolja je Elmira Zukić (OŠ „Podorašje“), druga je Merima Bešić („Druga OŠ“), a treća Abida Avdić (OŠ „Špionica“). U ekipnom plasmanu najuspješnija je OŠ „Špionica“, druga je OŠ „Podorašje“, a treća Druga osnovna škola Srebrenik.

Općinsko takmičenje iz hemije



Najbolji učenici OŠ iz hemije

Sredinom marta 2011.g. OŠ „Rapatnica“ je bila domaćin općinskog takmičenja učenika VIII razreda iz hemije, na kojem su se okupila 24 najbolja hemičara iz svih 8 OŠ s područja općine Srebrenik. Prvi je Amir Hodžić, druga je Džejlana Osmanović, oboje iz Druge OŠ Srebrenik, treća je Almedina Zahirović iz OŠ „Duboki Potok“, dok je četvrti Jasmin Hadžić, učenik Druge OŠ. U ekipnoj konkurenciji najuspješnija je Druga OŠ, druga je OŠ „Podorašje“, a treća OŠ „Duboki Potok“. Četiri najuspješnija takmičara dobili su diplome, a izborili su i pravo učešća na kantonalnom takmičenju.

Općinsko takmičenje iz biologije



Najbolji učenici OŠ iz biologije

U prostorijama OŠ Tinja, dana 02.04.2011.godine, održano je općinsko takmičenje iz biologije za učenike VII razreda. Takmičenju su pristupili učenici iz 7 OŠ sa područja Općine. U pojedinačnoj konkurenciji prva 3 mjesta su osvojili učenici Druge OŠ Srebrenik i to: 1)Karić Aldin, 2)Fazlić Medina i 3)Ibrić Alma, a slijede 4)Rikanović Anđelka iz OŠ Špionica, 5)Husić Adela iz OŠ Duboki Potok te 6)Mehmedović Merjema iz OŠ Tinja. Navedeni učenici će općinu Srebrenik predstavljati na kantonalnom takmičenju iz biologije. U poretku škola prva je Druga OŠ Srebrenik sa 244 bodova, druga je OŠ Duboki Potok sa 182,5 bodova a treća OŠ Špionica sa 181 bodom.

Za učenike MSŠ Srebrenik i OŠ Špionica nova priznanja

Kako je istakao Nedžad Bešić, na 16. međunarodnom konkursu za likovne radove mladih na temu: "Narodne nošnje i folklorne igre mog naroda", koji je početkom februara 2011.godine organizovan od strane Galerije mladih Celje, fotografija učenika MSŠ Srebrenik Elvisa Joldića, izrađena uz mentorstvo profesora likovne kulture Bešić Nedžada, osvojila je 1. mjesto u likovnom izrazu-fotografiji. Na nagrađenoj fotografiji prikazana je hrvatska narodna nošnja sa područja Gornjih Hrgova. O



Bešić Nedžad sa Joldić Elvisom i Zahirović Adnanom

kakvom uspjehu se radi dovoljno govori podatak da je na konkursu učestvovalo oko 8000 radova iz 35 zemalja svijeta. Uz čestitke na ovom velikom uspjehu vrijedi podsjetiti da je koordinator svih zbivanja u vezi organizacije likovnih aktivnosti za ovaj konkurs, profesorica Željka Banović. Kako je istakao Nedžad Bešić, na nedavno održanom konkursu za likovne radove mladih na temu: "Proljeće", koji je početkom marta 2011.g., organizovan od strane Niške općine Mediana, likovni rad učenika MSŠ Srebrenik Zahirović Adnana je osvojio 3. mjesto, dok je likovni rad „Pejzaž iz mog mjesta“ učenice OŠ „Špionica“ Delić Belme osvojio 2. mjesto. Oba rada su izrađena uz mentorstvo profesora Bešića, koji je ovim uspjesima nastavio niz dosadašnjih uspjeha i niega



Delić Belma

kao mentora i učenika kojima predaje likovnu kulturu. Čestitamo navedenim školama na ovim velikim uspjesima.



Održan tradicionalni božićni koncert



Detalj sa Božićnog koncerta

U organizaciji Hrvatskog kulturnog društva „Napredak“ Srebrenik, u velikoj sali srebreničkog Doma kulture, održan je tradicionalni božićni koncert, kojim je najavljen dolazak jednog od najvećih katoličkih blagdana. Pred oko 300 posjetilaca nastupile su sopranistica Katarina Kikić, pijanistica Tatjana Nakić i Ženska vokalna skupina „Empitaneja-Žepčanke“ iz Žepča, te folklorna skupina HKD „Napredak“ Srebrenik. Posjetioци su imali priliku uživati u prigodnim božićnim pjesmama, ali i narodnim pjesmama iz Dalmacije, Slavonije i Bosne i Hercegovine. Prigodne božićne poruke uputili su Filka Veselčić, predsjednica HKD „Napredak“ Srebrenik i fra Blaž Marković, župnik Župe Špionica, a čestitke katoličkim vjernicima povodom Božića uputili su i predstavnici aktuelne vlasti općine Srebrenik.

Hor MIZ Srebrenik i BZK Preporod Srebrenik gostovali u Petrinji



Nastup hora Medžlisa IZ Srebrenik

Bošnjačka nacionalna zajednica grada Siska i Sisačko-moslavačke županije, organizirala je 19.12.2010.g. „Festival bošnjačke kulture“ u Hrvatskom domu u Petrinji. Glavni učesnici ove manifestacije bili su hor Medžlisa Islamske zajednice Srebrenik i Bošnjačka zajednica kulture – općinski odbor Srebrenik. Naši predstavnici su srdačno dočekan od strane predstavnika Bošnjačke nacionalne manjine za grad Petrinju, gosp. Hajrudina Kulašića. Festival bošnjačke kulture počeo je nastupom zurlaša i bubnjara iz Srebrenika (koji su prijatelji BZK-a Preporod iz Srebrenika), nakon čega se u ime domaćina obratio Hajrudin Kulašić. U ime Grada sve prisutne pozdravio je Milan Herceg, zamjenik gradonačelnika Petrinje, a u ime Srebrenika Esad Dedić, viši stručni saradnik za informisanje i protokol općine Srebrenik. Nakon uvodne riječi organizatora, petrinjskoj publici su se predstavili članovi hora MIZ-a Srebrenik, koji su svojim nastupom – ilahijama, recitalima i osmjesima oduševili prisutne, a ovi su to nesebično propratili aplauzima i sa neskrivenim oduševljenjem. Hor se u nastavku programa predstavio sa još dvije tačke, a posebnu pažnju publike, svojim prekrasnom izvedbom, izazvala je najmlađa članica hora, desetogodišnja Melika Moranjkić. Jedan od sudionika programa, bio je i Pavao Anić, trinaestogodišnji slijepi dječak, inače pobjednik „I amaterskog festivala pjesme sevdalinke“ u Sisku. Svojim glasom i sviranjem harmonike, oduševio je ne samo petrinjsku publiku nego i goste iz Srebrenika. Naš sazlija Ahmet Hogić se prisutnima predstavio probranim sevdalinkama uz pratnju saza, dok je Mirsad Čehić otpjevao takođe nekoliko sevdalinki. Glavni imam sisački Alem ef. Crnkić i imam Gradske džamije u Srebreniku i koordinator hora Medžlisa IZ Srebrenik Emir ef. Brašnjajić, izrazili su zadovoljstvo festivalom, te su izrazili nadu da će se ova saradnja nastaviti.

Izložba levhi u Srebreniku



Zehrudin ef. Muhedinović

U povodu dana rođenja poslanika Muhameda a.s., u džamiji džemata Bare otvorena je izložba Levhi, autora Zehrudina ef. Muhedinovića. Levhe su dio islamske umjetnosti koje imaju cilj da nas približe Bogu, ali isto tako da nas približe jedne drugima, a kako je istakao autor, izložene Levhe imaju univerzalnu poruku ljubavi. Izložbu je otvorio Muhamed Bašić, imam u džamiji Bare, a promotori su Nijaz Alispahić, Fatmir Alispahić i prof. dr. Nusret Isanović. Inače, nakon tri internacionalne izložbe, jedne u Hamburgu i dvije u Beču, autor je odlučio da prvi put u historiji ovog grada organizuje jednu ovakvu izložbu u džamiji. Brojni okupljeni vjernici su imali priliku pogledati 23 izložene Levhe, kao i svi ostali zainteresovani građani tokom 10 dana, koliko je bila otvorena ova izložba.



Izložene Levhe

Hiljade ljudi na posljednjem ispraćaju Hasana Sarajlića i Džemala Buldića

Povodom tragične i iznenadne smrti Hasana Sarajlića, istaknutog srebreničkog privrednika, čovjeka čije je ime postalo sinonim za poslijeratni privredni razvoj općine Srebrenik, dana 22.01.2011.godine, u velikoj sali Doma kulture u Srebreniku, održana je komemorativna sjednica. Sarajlić se, zajedno s Džemalom Buldićem iz Srebrenika i Zajkom Husićem iz Zavidovića,



Sa komemorativne sjednice

otrovao plinom u lovačkoj čeki u Kamenici kod Zavidovića. Komemoraciji su prisustvovali predstavnici privrednog, političkog, kulturnog i vjerskog života općine Srebrenik i Tuzlanskog kantona, uposlenici i poslovni partneri firme "Kopex-Sarajlić" te prijatelji i brojna rodbina. O Hasanu Sarajliću kao istaknutom privredniku, poslovnom saradniku, zaljubljeniku u prirodu i iznad svega velikom čovjeku, govorili su Ismet Šiljić, direktor firme "Kopex-Sarajlić", Ramiz Karić, predstavnik Udruženja privrednika općine Srebrenik, Osman Suljagić, bivši načelnik općine Srebrenik i poslanik u Parlamentarnoj skupštini FBiH, Nedret Kikanović, predsjednik Privredne komore Tuzlanskog kantona, Izo Ahmetlić, predsjednik Udruženja prometnika naftnih derivata Federacije BiH i Samed Mehmedović, potpredsjednik Lovačkog društva "Majevisa" Srebrenik. Istakavši da je poslovni put Hasana Sarajlića počeo od male kovačke radionice postepeno prerastajući u poslovnog giganta i jednog od najznačajnijih privrednika ne samo u Srebreniku nego i u BiH, učesnici komemoracije posebno su naglasili da je Sarajlić bio čovjek vizionarskih pogleda i osebujnog poslovnog instinkta kao i veliki dobrotvor. Hasan Sarajlić je dobitnik nekoliko priznanja za svoj visoko profesionalan rad i to: 1)1994 godine, proglašen je za menadžera Tuzlansko-podrinjskog kantona među privatnim preduzetnicima; 2)1995 godine, za generalnog menadžera Tuzlansko-podrinjskog kantona; 3)1996 godine, za menadžera godine u Bosni i Hercegovini i 4)1998 godine, dobitnik je plakete općine Srebrenik. Hasan Sarajlić dao je veliki doprinos razvoju općine Srebrenik i na tomu mu velika hvala. Uprkos snijegu i velikoj hladnoći, ispred kuće Hasana Sarajlića u srebreničkom prigradskom naselju Bare, okupilo se



Detalj sa dženaze Hasana Sarajlića

nekoliko hiljada građana srebreničke i susjednih općina, koji su došli da odaju posljednju počast jednom od najznačajnijih bh. privrednika. Nakon vjerskog obreda, rijeka ljudi uputila se prema obližnjem gradskom mezarju Grabovci, posljednjem počivalištu velikog čovjeka i istaknutog srebreničkog biznismena. Uz članove uže porodice, ispred njegovog mezarja od Hasana Sarajlića oprostili su se njegovi najbolji prijatelji i dugogodišnji poslovni saradnici, a potom su na njegov mezar položeni brojni vijenci i cvijeće. Iza tragično stradalog Hasana Sarajlića ostale su kćerke Admira i Hasiya te unučad Maida, Admir, Amar i Amila, dok je njegova supruga Hajra umrla prije nešto više od sedam mjeseci. Istog dana, jedan sat ranije, obavljena je i dženaza Džema-



Detalj sa dženaze Džemala Buldića

lu Buldiću, uglednom srebreničkom privredniku i Hasanovom prijatelju, ispred čije se kuće takođe okupilo nekoliko hiljada građana koji su ga, nakon vjerskog obreda, ispratili do njegovog posljednjeg počivališta na gradskom mezarju Grabovci u Srebreniku. Iza Džemala Buldića ostali su kćerka Edina, sin Edin, supruga Zaima i unučad Selma, Šejla, Amar i Amila.

Za Sandrino liječenje u Srebreniku prikupljeno oko 8000 KM

U disco klubu „Kultura“, u Srebreniku, dana 29.01.2011.godine, održan je humanitarni koncert za liječenje Sandre Halilović oz Tojšića, koja je, usljed boravka u inkubatoru, po samom rođenju ostala slijepa. Ovoj humanoj misiji odazvali su se Adela Šečić, Samir Kurjaković, Asmira, Mujče Durić, Vele, Alen Jukan, te izvorne grupe „Rasema i Sifetovi izvori“ i „Tradicija“, iz Tuzle, koji su, bez honorara, u vrlo emotivnoj atmosferi, skoro šest sati zabavljali one, koji su svojim dolaskom odlučili podržati ovaj nesebičan gest. Pored roditelja, koncertu je prisustvovala i mala Sandra, koja je rasplakala publiku kada je izašla na pozornicu, kako bi zahvalila dobrim ljudima, kom prilikom je sa Adelom Šečić zapjevala pjesmu „Ispuni mi želju.“ A njena jedina želja je da vidi svog oca i majku, da vidi svjetlo dana, sunce, cvijeće i svoje drugare. Od ostvarenja njenog sna dijeli je 10.000 KM, koliko je potrebno za prvu operaciju u Zagrebu. Nakon humanitarnog koncerta šanse za ostvarenje sna ovog djeteta nisu nikada bile veće. Od prodatih ulaznica i pojedinačnih donacija prikupljeno je blizu 8000 KM, što je i dokaz da su, i pored teške ekonomske krize, građani Srebrenika spremni priskočiti u pomoć.



Sandra Halilović se zahvalila na pomoći

Na kraju ovog humanitarnog koncerta prezadovoljni su bili i organizatori: Agan Mašić, vlasnik disco kluba „Kultura“ i Admir Dorić, te Sandrini roditelji Elza i Halid, učesnici, donatori i publika, jer su, svi zajedno, još jednom dokazali da je Bosna zemlja dobrih ljudi.

Belma Ibrahimović i Arnel Salihbašić najbolji



Načelnik sa najboljim sportistima Srebrenika za 2010. g.

Za najboljeg sportistu i sportašicu na području općine Srebrenik u 2010. godini, izabrani su odbojkašica Gradine-Herceg Belma Ibrahimović i nogometaš Gradine Arnel Salihbašić! Ibrahimovića je već nekoliko godina jedna od najboljih odbojkašica ovog kolektiva, dok je Salihbašić s „plavima“ izorio povratak u Prvu ligu FBiH. Njima je prizna-

nja uručio aktuelni načelnik Mehmed Bajrektarević. U kategoriji fudbala priznanja su još dobili Amar Osmanović iz N.K.Ingram (najbolji pionir), Dino Andrić iz N.K.Gradine (kadet), Damir Muratović iz N.K.Gradine (junior), Melisa Hasanbegović iz Ž.N.K.Gradina, dok je N.K. Gradina proglašena za najbolju seniorsku ekipu. U kategoriji dvoranskih sportova, najbolja seniora je odbojkašica Gradine-Herceg, Belma Ibrahimović, a Hasib Buljubašić iz Košarkaškog kluba Gradina, najbolji je senior, dok je Košarkaški klub Gradina najbolji sportski kolektiv u ovoj kategoriji. Elma Muratović iz Karate kluba 1. Mart, najbolja je kadetkinja u kategoriji borilačkih sportova, a najbolji kadet je Sakib Suljić, njen klupski kolega, dok je Amir Arifović izabran za najboljeg seniora u kategoriji dvoranskih sportova. Kod ostalih sportova, Nijaz Smajlović iz Šahovskog kluba Srebrenik, izabran je za najboljeg šahistu. U kategoriji posebnih priznanja, Fahir Zukić je dobio Plaketu za pomoć u razvoju sporta na području općine Srebrenik, Petar Ivanek za doprinos u razvoju masovnog i školskog sporta, Samir Bekrić za afirmaciju sporta van granica naše države, a Albina Džafić za razvoj borilačkog sporta na području Općine.

Održan Drugi međunarodni karate kup „Srebrenik 2011“



Dana 13.03.2011.godine, u SRC Srebrenik, održan je Drugi međunarodni karate kup „Srebrenik 2011.“, na kojem je nastupilo 490 takmičara iz 32 kluba s područja BiH, Hrvatske i Srbije, koji su demonstrirali svoje vještine u kategorijama kate i borbe. U ukupnom poretku prvo mjesto je osvojila „Viktoria“ iz Žepča s 14 zlatnih, 4 srebrene i 3 bronzane medalje, na drugom mjestu je K.K. „Orka“ iz Lukavca čiji su predstavnici osvojili 6 zlatnih, 13 srebrnih i 9 bronzanih medalja, a na trećem K.K. „Sensei“ iz Turije s osvojenih 6 zlatnih, 9 srebrnih i 14 bronzanih medalja. U apsolutnoj kategoriji u ženskoj konkurenciji prvo mjesto je osvojila Amina Hadžić (K.K. „Ha-Se karate do“ Zenica), na drugom mjestu je Mirela Huseinspahić (K.K. „Ha-Se karate do“ Zenica), a na trećem Đenana Mehić (K.K. „Salko Ćurić“ Travnik). U muškoj konkurenciji prvo mjesto u apsolutnoj kategoriji izborio je Miralem Mandžuka (K.K. „Stari Grad“ Sarajevo), na drugom mjestu je Ramiz Ćorina (K.K. „Futura“ iz Bugojna), a na trećem Meho Plavšić (K.K. „Forma“ iz Tuzle). Za najuspješnijeg takmičara i takmičarku s osvojene po 3 zlatne, 1 srebrnu i 1 bronzanu medalju proglašeni su Aldin Karić i Minela Hadžić, oboje iz K.K. „1. mart“ Srebrenik. Ukupan nagradni fond turnira iznosio je 1.000 KM i raspodijeljen je na najbolje plasirane takmičare u apsolutnoj kategoriji, a najuspješnijim klubovima i pojedincima uručene su i medalje, pehari i diplome. Međunarodni karate kup „Srebrenik 2011.“ organizirao je K.K. „1. mart“ Srebrenik u povodu šeste godišnjice postojanja i rada ovog sportskog kolektiva.

„Džindo“ pobjednik Božićnog nogometnog turnira

Ekipa "Džindo" Doborovci iz Gračanice, pobjednik je tradicionalnog Božićnog malonogometnog turnira 2010, koji je, u organizaciji N.K. „Frankopan“ Špionica, održan u „SRC“ Srebrenik. Turnir je otvorio v.d. načelnika općine Srebrenik Bajrektarević Mehmed, a najboljima su uručene diplome, pehari i novčane nagrade. Na turniru je nastupilo 19 ekipa iz Srebrenika i okoline, a pobjednička ekipa je nakon 2:2, boljim izvođenjem jedanaesteraca, pobijedila u finalu ekipu „Posavina-108“ iz Brčko DC-a, dok su u borbi za treće mjesto, nakon boljeg izvođenja jedanaesteraca, igrači „Jahić company“ iz Srebrenika bili bolji od ekipe "Forum mladih SDP". Najbolji igrač i strijelac je Avdo Huskanović iz pobjedničke ekipe, dok je nagrada za fer-plej otišla u ruke Hodžić Nedžad u iz ekipe „Luka-Safibro“.

